

籌辦夷務始末

卷三十九之四十

籌辦夷務始末卷之三十九

道光二十一年辛丑十月乙巳浙江巡撫劉韻珂奏竊照逆夷占據甯波鎮海以後情形前經臣兩次附片奏報均已仰蒙

聖鑒在案嗣又疊據各屬探稟甯鎮兩處夷船仍係十隻內外往來無定惟聞船內有打造軍器之聲甯波城內夷衆有購買頂帽及內地衣服情事又有本地奸民受雇為之巡邏街道該逆復逼脅鋪戶勒限開鋪並張貼偽示言將占奪全省民人無從逃避等詞臣以該逆購備內地衣帽恐其遣令漢奸假充官弁混入窺探當經通飭各屬嚴密盤查

並飭隨時查探稟報去後。本月十三日。又據慈谿縣知縣王武曾等稟稱。十一日。有逆夷二百餘人。內有三人乘坐馬匹。各帶刀械。並擡大小礮二位。由陸竄至該縣之西壩地方。即經防守兵勇。將渡船拔上塗邊。各逆不能過渡。用車盤一路量地轉回等因。臣當即飛咨提臣余步雲。陳階平。會同前任藩司鄭祖琛。於曹娥江防兵內。酌量抽撥。派員帶領前往。擇要守禦。並囑令時加偵探。如該逆果往滋擾。該提督等二人中酌留一人。在曹江駐守。一人即帶往策應。以免疏虞。茲復據慈谿縣以探聞該逆因甯波郡城內店鋪。多係慈谿人在彼開設。現均關閉回籍。該逆屢令

店戶開張。慈谿人並未前往。欲至慈谿滋擾等情。續稟前來。臣查慈谿密邇甯波。本屬可慮。前此該逆曾至縣屬之丈亭地方探水。已有窺伺之意。因縣城非往來要道。且紳民於通郡港內釘椿阻截逆船。不能即入。藉以為安。今該逆復由陸路竄入縣境。情殊叵測。據該縣探因縣民不肯赴郡貿易。故逆眾欲往滋擾。雖不必果屬確實。但茲邑本屬著名殷富之區。在甯郡之巨商大賈。原屬不少。所探不為無因。至該逆所以能知甯郡鋪戶。多屬慈民。自係本地奸民向其告述。現在奸民為該逆所役使者。日漸眾多。其意不過藉圖漁利。慈民之富足。奸民素所垂涎。難保不勾

引該逆前往。藉以乘機搶奪。防之不可不嚴。臣雖咨行提臣等。派兵往守。並囑令查探策應。惟曹江兵數尚單。勢難多派。設該逆大夥往彼侵犯。能否抵禦。殊難懸定。

劉韻珂又奏。臣前奉

諭旨。飭令鼓鑄一二千斤上下大礮數十位。以備要需。經臣查明鎮海礮局所鑄各礮。均已遺失無存。省局所鑄礮一百餘位。除分撥各海口外。局中僅存銅鐵各礮一十五位。惟未用之鐵。尚有十數萬斤。自應趕緊鼓鑄。以備攻剿。於九月十六日。恭摺由驛覆奏。嗣於十月初一日。欽奉

上諭。礮火為攻賊要需。斷不可少。著該撫即就現在浙省鐵斤。趕

緊飭令匠役添堵爐座。剋期鎔鑄。總需適用。毋稍遲延。應於何處鄰省。咨取鐵斤之處。一面酌辦。一面奏明等因。欽此。茲據委員督飭工匠陸續製成鐵礮六十七位。連前存之銅鐵礮十五位。共計八十二位。均在一二千斤上下。堪以適用。臣查此次委員督飭匠役。於一月之內。鑄成大礮六十餘位。尚屬迅速。揚威將軍等到日。即可提用。惟大礮為行軍利器。戰守兼資。現在數未盈百。尚恐不敷攻剿。且將來恢復一處城池。即須安設一處礮位。計甯波鎮海定海三處。需礮甚多。即省城及沿海各要口。亦須逐一添設。守禦方能完固。自應接續鑄造。以供目前之用。兼為善後之圖。今局

中存鐵無多。必須另行採買。方足以資鼓鑄。臣現已飭局
遴委幹員。齎銀赴楚。購買紫版等鐵。四五十萬斤。解回應
用。並咨湖廣督臣裕泰。飭令該地方官會同購覓。以免牙
戶人等昂價居奇。第此項鐵斤。楚省亦屬稀少。能否足數。
難以懸擬。且楚浙相距較遠。往返非三數月不可。浙省需
礮正殷。亦未便停爐以待。自應添鑄銅礮。以資應用。查浙
省自開設礮局以來。曾經奏准鑄造銅礮。計鎮海局。陸續
提用過寶浙局洋銅二十三萬斤。滇省銅三十萬斤。省局
亦提用過洋銅三萬斤。又於軍需項下。動支銀兩。赴蘇買
得商銅四萬三千餘斤。除鎮海局鑄成各礮。及用騰銅斤。

均已遺失外。省局提用及買得之銅。業已鑄成礮位。現在礮局並無存銅。應請再提寶浙局洋銅三萬斤。一面專人赴蘇。添購商銅二萬斤。並購應行攪和之錫。尅日運回。以期源源製造。足敷攻守之用。臣總當嚴飭督匠趕辦。以濟要需。斷不任其遲滯。其所用洋銅價本。及收買商銅價腳。均於軍需項下。分別撥還給發。以清款目。

劉韻珂又奏。再臣前因省垣重地。防守宜嚴。派撥官兵。並團集義民沙民二萬餘名。分布城內。協力守衛。並雇船二十四隻。配兵管駕。在錢塘江梭織巡查。業經具奏。仰蒙

恩諭。所辦均屬周妥。仍著督飭文武員弁。董率該兵丁義勇沙民

等嚴密防堵等因。欽此。遵即督同文武。激勵該兵勇義民等。認真防堵。不敢稍弛。並以團練義民之法。有合於古人寓兵於農之意。但使閭閻人人固結。則眾志成城。自不難於保衛。浙省民氣素柔。今因逆夷逼處。經臣再三勸勉。亦皆懼而思奮。自應因勢利導。以期化弱為強。合散為聚。俾壯聲勢。而固疆圉。遂督同藩司常恆昌。分委員升。在沿江一帶。及附郭各村落。妥為勸諭。茲又團集義民二萬餘名。造有花名清冊。該義民俱念切同仇。以逆夷僅敢前來。定當合力奮擊。以衛地方。察看情形。頗為整練。至省城周圍四十里。其間長街曲巷。處處可通。巡緝匪易。現又督同該藩司

委員勸令紳民捐設柵欄五百餘座。派令兵勇義民專司啟閉。至晚柵內按戶支更。通宵不絕。月餘以來。匪徒絕跡。民間之安堵。勝於無事之時。因之人心漸定。前此遷移之戶。已有轉回。臣以錢塘江為杭紹要津。并旁通海甯富陽等州縣。最為喫緊之區。巡察尤不可不嚴。惟江面遼闊。一望無涯。前配巡船二十四隻。尚恐不能周密。復又雇船十隻。并雇年力精壯。熟習該處情形之鄉勇五百八十名。照海甯州雇勇之式。每名日給雇值錢三百文。又船價及油燭等項。錢十五千八百文。於本月初十日為始。飭令協同兵船往來巡邏。俾錢塘江偵緝較嚴。儻有漢奸潛入。不難

搶獲實於省城防堵事宜大有裨益

劉韻珂又奏。竊照用兵之道。足食為先。浙省自上年六月間。逆夷犯順。沿海各屬。調兵募勇。節節守衛。日給口糧。所費正鉅。臣督飭局員。悉心籌畫。或碾動倉儲。或採自商販。源源支應。均無缺乏。今該逆復來滋擾。疊陷三城。仰蒙我皇上命將出師。大彰撻伐。計奉調各省官兵。不日雲集。報回散兵。及雇募鄉勇。亦漸增多。均須支給糧米。又鄞鎮定三縣難民。流離各處。經臣通飭各屬。妥為安撫。亦須給米賑恤。合兵勇難民三項。計口授食者。不下數萬餘人。浙省地狹人稠。本省所產之米。本屬不敷民食。且本年夏秋之間。雨水

過多。現在刈穫之候。又遭霖雨。湖州等府。田畝率多災歉。即勘非成災成歉之區。收成亦皆減色。又定海等縣。被該逆所占。台溫兩府。海道亦皆梗塞。該數處米穀。均不能內運。是以較往年尤形短絀。臣前於甯波失守之後。奏明飭委在籍人員。前赴湖北。江西。安徽。江蘇等省。招商販米。來浙糶賣。並懇免輸關稅。以冀商販踴躍。業經奉

旨允准。迄今一月有餘。販米至浙者。寥寥無幾。自因逆氛猖獗。以致裹足不前。臣又委員在蘇省採買米數萬石。然為數無多。深恐難資接濟。至各州縣額貯倉穀。歷年本即動缺。未經買補。自上年以來。所動尤多。餘存穀石。自應留備不虞。

未便儘數碾用。且各州縣遠近不等。若於遠處運米濟放。水陸腳價。為費不貲。亦恐轉滋糜費。臣與總局司道等。再四熟籌。伏查浙省杭嘉湖三府。每年額徵漕白二糧。幾及百萬石。本年除成災各屬。俟查明確數。另摺奏請展緩外。約尚應起運米數十萬石。若酌量截留。則兵糧可期充裕。民食亦不致有妨。實屬兩有裨益。據該局具詳請奏前來。合無仰懇

皇上俯念浙省需米甚多。准於道光二十一年。應行起運漕米內。截留一十五萬石。以資接濟。感沐

鴻慈。實無既極。

諭軍機大臣等。本日據劉韻珂馳奏。逆夷窺伺慈谿。派兵防守一摺。據稱本月十一日。逆夷二百餘人。攜帶礮械。由陸竄至該縣西壩地方。經兵勇將渡船拔上。逆夷不能過渡。已飛咨余步雲陳階平。勤加偵探。如有滋擾。即酌派一人帶兵接應等語。慈谿向稱殷富。難保無從逆奸民勾串。夷匪前往。藉圖乘機搶奪。曹娥江兵數尚單。勢難多派。約計揚威將軍奕經等即日可抵浙江。應如何添兵防守。著即會商妥籌。毋致疏虞為要。其片奏省城防守情形。現已團集義勇數萬人。雇備船隻。於錢塘江一帶巡邏偵緝。不任漢奸潛入。現在匪徒絕跡。民間安堵。覽奏甚慰。即照所議。妥為辦理。又另摺奏續鑄大礮一節。據奏現已鑄成。

大礮八十二位。均在一二千斤上下。堪以適用。並於楚省購買鐵斤。及提寶浙局洋銅。一面赴蘇添購銅錫。源源製造。所辦尚屬周妥。著即嚴飭趕辦。以濟要需。毋稍遲滯。所用洋銅價本。及收買商船價腳。准於軍需項下。分別撥還給發。所請截留漕糧。准其於道光二十一年。應行起運漕米內。截留十五萬石。以資接濟。其台州。温州。海道梗塞。米穀不能內運。著該撫設法運至省城。以裕兵食。仍嚴防該處奸民。影射濟匪情事。

盛京將軍耆英奏。竊照九月二十七日。承准軍機大臣字寄。

九月二十二日。奉

上諭。沿海各省。兵額無多。著該將軍督撫等。將該省險要各海口。

查明共若干處。何處應添兵若干名。即於本省各營內。或量為裁撥。或分年換防。逐一詳細查明。妥議具奏。拒礮之法。惟土堡最為得力。著將軍督撫等。諭令沿海居民。處處仿此辦理等因。欽此。查奉天南臨濱海。北界邊荒。所有各城額兵。多則七八百名。少則三四百名。東西各路額兵。一二百名不等。省城西額兵五千二百餘名。其各項差徭繁多。在在需人。又邊外卡倫。看守圍場封堆等項。每年共需兵九百餘名。均應按季輪流派往。是奉天駐防滿兵。與各省綠營官兵。情形不同。竊復查奉天各海口。惟金州為最要之區。竊上年前往體察。兵數較少。旋省後再四商酌。將各城零額兵缺。

請撤歸金州挑補。於道光二十年十月十五日奏奉

諭旨。飭部議准。遵行在案。現在金州已有額兵八百六十二名。至省城及北路各城兵額。拏率同各旗協領等。悉心商酌。通盤覈計。似難再議撤歸南路挑補。且南路各城相距遠者二百餘里。近者一百餘里。僅有警報。均可互相應援。似可無須換防。至土堡實為禦敵要法。即應仿照辦理。拏當札飭旗民地方官。除沿海各口已挖壕堆壘之處。今仍須加高培厚。並令傳知沿海居住旗民。務須以沙墩土壘。自為障蔽。不獨可以免敵。更可安定人心。惟查奉天州縣。向不隸拏管轄。今揀派有守有為。素得民心之州縣。勸諭之處。